

Resucita for di e pesadiya di Plantation Bay....

ARUBA MARRIOTT RESORT A HABRI SU PORTA OFICIALMENTE

ORANJESTAD (AAN): E Aruba Marriott Resort & Casino a habri su portanan oficialmente.

Esaki a socede ayera-mainta durante un ceremonia especial.

Presente tabata Olindo Koolman, gobernador di Aruba y su señora, prome ministro Henny Eman, ministro di Asuntonan Economico y Turismo Tico Croes, y presidente di Parlamento Marco Christiaans.

Tambe tabata ey Scott Ringer, general manager di Aruba Marriott y William Tiefer, presidente di Marriott Lodging.

Invitado especial tabata professor doctor Marius Jonkhart, presidente di De Nationale Investeringsbank (NIB).

Profesor Jonkhart a duna un speech tambe, esta, durante e conferencia di prensa cu tabata tin prome cu e apertura.

Den e speech, el a elabora tocante e periculonan cu tabata tin rond di Plantacion Bay, loke tabata e number di e proyecto original.

Plantacion Bay, Beta Hotel y Palm Beach Hotel tabata e tres proyectonan cu a haya nan den dificultad grandi, tempo di e escandalo rond di SACE.

Medio 1992, Nel Oduber, e prome ministro den e epoca ey, y Ernst Hirsch Ballin, e

ministro Hulandes di Aruba y Antillas, a pidi e Nationale Investeringsbank pa studia e proyectonan y bin cu un solucion pa nan.

Pa loke ta trata Plantacion Bay, e banco a conclui cu e tabata un proyecto comercialmente factible.

Esaki pa motibo cu, contrario cu Beta Hotel y Palm Beach Hotel, Plantacion Bay no tabata tin un historia di overspending.

NIB a funda e ora, e compania Oranjestad Property Management (OPM) cu a traha un budget y a lanta e proyecto di nobo.

Tambe el a fix e deal cu Marriott, mientrastanto cu construccion a cuminsa na 1993 y a dura te cu juni di 1995.

E proyecto a costa un total di 70 milyon Dollar, loke kier meen cu el a keda dentro di e budget cu a wordo stipula na 1992.

Naturalmente ta asina, esey Jonkhart a splica tambe, cu si e proyecto no a wordo interumpi, e lo a sali menos

placa.

Sinembargo, danki na e control stricto di OPM y e excelente maneho di Marriott, e costo a wordo teni relativamente abao.

Segun e profesor, e finalizacion di e proyecto aki, ta e prueba cu e pesadiya di e hotel-ruinanan lo termina un dia.

Pa solucionar un situacion manera esun di Plantacion Bay sinembargo, hopi profesionalismo ta rekeri.

Esaki no solamente pasobra cu e proyecto ta uno complica, sino tambe pa motibo cu tin bastante emocion envolvi, tanto politico como no-politico.

Riba dje, e tipo di proyecto aki ta atrae aventureronan, interesa unicamente den gana placa liher a costo di Aruba.

Na momentonan asina, Aruba tin mester di amigonan cu ta dispuesto na drenta den un compromiso a termino largo y Jonkhart ta mira NIB y Marriott como e clase di amigo aki.